

Iruñean eta Miarritzen ez ezik, UEUk Zizurkil eta Izaban ere egingo ditu aurten ikastaroak

'Eraiki garaia, erabaki garaia' leloaz, uztailean hasiko dira Lapurdiko hirian

Alberto Barandiaran / Iruñea

Miarritzen uztailaren 10ean hasiko diren ikastaroekin abiatuko da Uda-ko Euskal Unibertsitatea-ren (UEU) 28. ikastaldia. Aurten Lapurdiko hirian eta Iruñean ez ezik Zizurkilen eta Izaban ere saioak egingo ditu. Xabier Isasi UEUko zuzendariak azpimarratu zuen atzo aldatzen ari den unibertsitatearen eta euskaren munduari ekarpena egitea dela, egun ere, UEUren helburua.

UNIBERTSITATEAREN eta euskararen munduan gertatzen ari diren aldaketek ekarpenak egitea helburu, euskaldunen trebakuntza unibertsitarioan laguntzeko, datorren uztailaren 10ean abiatuko dira Miarritzen aurtengo UEUko ikastaroak. Ohiko eskaintza zabalari aurtent bi egoitza gehitu zaizkio, Izaban eta Zizurkilen; *Teknikak basabizitzaren kudeaketan* eta *Euskokantauriar arroaren mendealdeko ezaugarri geologikoak* gaiak jorratuko dituzte, hurrenez hurren.

Espezializazioa eta teknologia berriak

33.500.000 pezetako aurrekontua izango dute ikastaroek, Eusko Jaurlaritzaren Hezkuntza eta Kultura Sai-



JOXE LACALLE

UEUko arduradunek Nafarroako Hizkuntza Politikako zuzendari nagusi Fernando Perez de Viñasprekin aurkeztu zituzten ikastaroak.

lek, Nafarroako Gobernuak eta Bizkaiko eta Gipuzkoako diputazioek diruz lagunduko dituztenak. Ikastaroen espezializazioa azpimarratu zuten atzo antolatzaileek Iruñean eginiko aurkezpenean. Horrela, hainbat sailek ikastaro bat baino gehiago antolatu dute, esate baterako Historia sailak —*Jesuitak eta Jesusen Lagundiaren Historia* eta Sozialisten agintaldia

Frantzia eta Espainian— eta Bertsolaritza sailak —*Eskolan ahozotasuna lantzeko metodoa* eta *Bertsolaritzaren ikerketarako metodologia*—.

Baina, batez ere, teknologia berriei zabalduko zaien atea aipatu zuen Mari Carmen Menika UEUko Idazkari Orokorrak. Horrela, musika sailean *Poutpourria: hotsa, informatika, musika-tresnak, musika eta euskara* izeneko

ikastaroa prestatu da, eta itzulpengintzan *Itzulpengintza automatikoa* izenburupekoa.

Orotara 35 ikastaro izango dira, eta izena emateko epea maiatzaren 15etik ekainaren 16ra bitartera izango da. Matrikulen prezioa 8.000 pezeta (320 libera) eta 27.500 pezeta (1.100 libera) bitarte izango da, ikastaroen arabera.

Energia berriztagarriei probetxua atera asmoz, 64 mila milioi pezeta inbertituko ditu Jaurlaritzak

■ Gasteizko Gardelegi zabortelegian egin asmo duten Biogardelegi proiektua aurkeztu zuten atzo

Erredakzioa / Gasteiz

JOSU JON IMAZ Industria sailburuak atzo jakinarazi zuenez, 1995 eta 2005 urteak bitartean, Eusko Jaurlaritzak 64.000 milioi pezeta inbertituko ditu guztira energia berriztagarrien probetxuan. Jaurlaritzaren helburua, «hamar urte horietan EAEko energia kopuruaren %9 baliabide berriztagarrien bidez ekoiztea da».

Azalpen horiek, Gasteizko Udalarekin batera sortutako Biogardelegi proiektuaren aurkezpenean egin zituen Imazek. Proiektu hori, Gas-

teizko Gardelegi zabortelegian bideratuko da, eta helburua, bertako zaramaren hartziduratik sortutako gas energetikoa aprobetxatzea da. Josu Jon Imazen ustez, «egitasmoak ekonomikoki eta ingurugiroaren aldetik onurak ekarriko ditu, eta baliabide berriztagarritik energia elektrikoa lortzeko bidean eredu izango da».

Proiektua gauzatu ahal izateko, 100 milioi pezetako inbertsioak egingo dituzte Gardelegin. Hainbat ikerketen arabera, zabortelegira 95.000 tona zabor bideratzen dira urtero, eta bertan sortu-

tako gasa metanoa da %50ean. Ondorioz, metano kantitate hori aprobetxatuta, 5.500 pertsonen kontsumo elektrikoa ahalbidetuko litzateke, ikerketa horien arabera.

EBren proposamena salatu dute ekologistek

Europako Komisioak energia berriztagarrien erabilera areagotzeko proposamena aurkeztu zuen atzo Bruselan. Horren arabera, Europako Batasuneko herrialdeek iturri berriztagarrietatik ekoiztutako energiaren erabilera

%12koa izan beharko du 2010 urterako. Proposamen hori EBko herrialdeetako energia ministroek eztabaiatu beharko dute maiatzaren amaieran.

Greenpeace taldeak atzo bertan plazaratu zuen iritzia, eta Europako Komisioaren neurria «handinahirik gabekoa» dela salatu zuen. Michel Raquet erakunde ekologistako kidearen arabera, «proposamenak ez du zehazten herrialde bakoitzak noizko ekoiztu beharko duen energia berriztagarritzko kopuru hori. Ondorioz, epea atzera dezakete».

A-15 autobidearen kasuan «suarekin jokatzeari» egotzi dio Sanzek PSNri

■ Sozialistek txostena gainerako alderdiek ezagutu aurretik kaleratu izana salatu du EHk

Erredakzioa / Iruñea

NAFARROAKO PRESIDENTE Miguel Sanzek hitz gogorak izan zituen atzo PSN alderdiarentzat A-15 autobidearen doakotasunaren alde sozialistek egin duten apustuagatik. Zentzu horretan, «PSN suarekin jokatzeari» ari dela adierazi zuen Sanzek. Era berean, Nafarroako Parlamentuaren gehiengoak sozialisten proposamenarekin bat egingo balu, «neurriak hartzeko prest» azaldu zen. «Presidente naizen elean, Nafarroaren bideragarritasun ekonomikoa arriskuan jarriko balute, jakingo dut zer egin», adierazi zuen Sanzek irratian kate bati egin adierazpenetan.

Kontu Ganberak egin-dako ikerketaren datuak azpimarratu zituen Nafarroako presidentek bideragarritasun ekonomikoa arriskuaz ohartarazteko. Horren arabera, autobidearen doakotasunak 60.000 eta 130.000 milioi pezeta arteko galera eragingo luke «azken zifra horretatik gertuago, noski», adierazi zuen Sanzek. Nafarroari, autobidearen erdiaren jabegoa dagokionez, «60.000 edo 65.000 milioi pezeta inguru lirateke». Miguel Sanzen arabera, «inongo aurrekontuk ezingo lioke aurre egin diru kantitate horri, zergak igotzearen bidez ez bada. Hori ez lukete jasango nafar gehienek, jasanezina delako».

EH: «PSNk etekin politikoa bilatu du»

Euskal Herriarrok taldeak, bestalde, autobidearen doakotasunaren inguruan PSNk izan duen jarrera salatu zuen prentsa ohar baten bidez. EHren iritziz, A-15 autobidearen inguruko informea gainerako alderdiek ezagutu aurretik publiko egin izana, «etekin politikoa lortu asmoz» egin zuten sozialistek. Hori dela eta, PSNk «gainerako adardi politikoei desleialtasunez eta mespretxus» jokatu duela kritikatu zuen EHk prentsa oharrean.